

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA**

OBRAĐIVAČ: SLUŽBA ZA FINANSIJE

**IZVJEŠTAJ
O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2025. GODINU I
NACRT ODLUKE O IZVRŠAVANJU BUDŽETA
GRADA ZENICA ZA 2025. GODINU**

Zenica, januar 2025. godine

**IZVJEŠTAJ O PROVEDENOJ JAVNOJ RASPRAVI NA
NACRT BUDŽETA GRADA ZENICA ZA 2025. GODINU I
NACRT ODLUKE O IZVRŠAVANJU
BUDŽETA GRADA ZENICA ZA 2025. GODINU**

Na 3. sjednici Gradskog vijeća Zenica, održanoj dana 17.01.2025. godine, utvrđeni su Nacrt Budžeta Grada Zenica za 2025. godinu i Nacrt Odluke o izvršavanju Budžeta za 2025. godinu, te su isti upućeni na javnu raspravu u trajanju od 10 dana od dana održavanja sjednice Gradskog vijeća, odnosno zaključno sa 27.01.2025. godine.

Utvrđeni Nacrt Budžeta Grada Zenica za 2025. godinu, Obrazloženje Nacrta Budžeta Grada Zenica za 2025. godinu i Nacrt Odluke o izvršavanju Budžeta Grada Zenica za 2025. godinu sa Obrazloženjem objavljeni su na web stranici Grada Zenica (zenica.ba).

Na samoj sjednici vijećnici su iznijeli svoje primjedbe, prijedloge i sugestije, i na većinu istih predlagač je odmah dao svoj stav, ali i pozvao sve predstavnike klubova Gradskog vijeća Zenica na zajednički sastanak, na kojem će se razgovarati o njihovim prijedlozima na Nacrt Budžeta Grada Zenica za 2025. godinu.

U Gradskoj upravi Zenica održan je zajednički sastanak dana 24.01.2025. godine, kojem su prisustvovali Gradonačelnik Zenice Fuad Kasumović, predstavnici Službe za finansije i predstavnici političkih stranaka koje participiraju u Gradskom vijeću, u cilju razmatranja prijedloga, primjedbi i sugestija, a sve kako bi se pripremio što kvalitetniji Prijedlog Budžeta Grada Zenica za 2025. godinu.

Sastanku su prisustvovali: Klub vijećnika BHI-KF, Klub vijećnika SDA, Klub vijećnika SDP, predstavnik Naše stranke, vijećnik Pokreta i vijećnik Snage Naroda.

Vijećnici su iznijeli svoje primjedbe, prijedloge i sugestije od kojih je Predlagač većinu prihvatio, a primjedbe i prijedloge za koje trenutno nije u mogućnosti udovoljiti, Predlagač je dao svoj stav, uz obrazloženje da je opredjeljenje gradske uprave da Prijedlog Budžeta Grada Zenica za 2025. godinu bude razvojnog karaktera sa prioritetnim projektima, kao što su izgradnja zatvorenog olimpijskog bazena i aqua parka, završetak izgradnje objekta Službe hitne medicinske pomoći sa pratećim sadržajima, kao i rekonstrukcija i investiciono održavanje ambulanti, društvenih domova, poslovnih zona, te rekonstrukcija Trga Alije Izetbegovića.

U toku javne rasprave dostavljene su primjedbe, prijedlozi i sugestije na Nacrt Budžeta Grada Zenica za 2025. godinu, a Služba za finansije je iste prosljedila nadležnim budžetskim korisnicima na razmatranje i nadležno postupanje.

U nastavku dajemo pregled dostavljenih primjedbi, prijedloga i sugestija sa stavom predlagača, odnosno nadležnog budžetskog korisnika.

1. Interventna spasilačka služba Zenica, Klub vijećnika BHI-KF, Klub vijećnika SDA Zenica i Klub vijećnika SDP Zenica predlažu da se planiraju sredstva za sufinansiranje rada Gorske službe spašavanja i Interventne spasilačke službe Zenica, tako da budžetska pozicija glasi "Transfer za sufinansiranje rada Gorske službe spašavanja i Interventne spasilačke službe Zenica" u ukupnom iznosu od 30.000,00 KM. Takođe, zahtjev Interventne spasilačke službe odnosi se i na nabavku čamca za spašavanje na divljim vodama, pa predlažu da se planiraju sredstva na budžetskoj poziciji "Kapitalni transferi neprofitnoj organizaciji ISS Zenica za zaštitu i spašavanje" u iznosu od 11.000,00 KM.

Stav predlagača

Prema stavu Službe civilne zaštite, pri ovoj Službi postoji više jedinica zaštite i spašavanja među kojima je i ISS (Interventna spasilačka služba) Zenica, a koje se opremaju iz sredstava posebne namjene u skladu sa određenim zakonskim procedurama.

U skladu sa navedenim, predlagač je razmotrio i djelimično prihvatio dostavljene prijedloge, i to na način da je Prijedlogom Budžeta Grada Zenica za 2025. godinu na organizacionom kodu Službe civilne zaštite uvrstio dvije nove budžetske pozicije:

- "Transfer za sufinansiranje rada Gorske službe spašavanja" u iznosu od 12.000,00 KM i
- "Transfer za sufinansiranje rada Interventne spasilačke službe" u iznosu od 12.000,00 KM.

2. Klub vijećnika SDA Zenica predlaže da se planiraju sredstva na novoj budžetskoj poziciji i to na ime naknade za svako novorođeno dijete na području grada Zenica.

Stav predlagača

Predlagač je razmotrio upućeni prijedlog, te isti djelimično prihvatio, tako da je u Prijedlogu Budžeta Grada Zenica za 2025. godinu planirao sredstva u iznosu od 200.000,00 KM na novoj budžetskoj poziciji "Jednokratna novčana pomoć za podršku porodicama za drugo i svako naredno rođeno dijete", a resorna Služba će pripremiti pravilnik sa utvrđenim kriterijima za ispunjavanje uslova za ostvarivanje predmetne pomoći.

3. Klub vijećnika SDA Zenica predlaže povećanje budžetskih pozicija "Transferi za podršku vjerskim zajednicama" za iznos od 10.000,00 KM, "Transferi pojedincima - pomoći na ime teške ekonomske situacije, liječenje boračke populacije i stambeno zbrinjavanje" za iznos od 100.000,00 KM, "Programi i projekti za podršku mladim i djeci" za iznos od 10.000,00 KM, "Izdaci za tekuće održavanje putne mreže u MZ Mošćanica (sredstva eko rente)" za iznos od 20.000,00 KM i "Transferi Agenciji ZEDA i REZ za podsticaj razvoja preduzetništva i obrta - finansiranje projekata" za iznos od 100.000,00 KM.

Stav predlagača

Predlagač je razmotrio upućene primjedbe, djelimično iste prihvatio, te Prijedlogom Budžeta za 2025. godinu planirao sljedeće budžetske pozicije:

- "Transferi za podršku vjerskim zajednicama" u iznosu od 70.000,00 KM, a što je za 10.000,00 KM više u odnosu na Nacrt Budžeta;

- "Transferi pojedincima - pomoći na ime teške ekonomske situacije, liječenje boračke populacije i stambeno zbrinjavanje" u iznosu od 150.000,00 KM, a što je za 30.000,00 KM više u odnosu na Nacrt Budžeta;
- "Programi i projekti za podršku mladim i djeci" u iznosu od 60.000,00 KM, a što je za 10.000,00 KM više u odnosu na Nacrt Budžeta;
- sredstva Eko rente planirana su u iznosu od 61.764,10 KM, a utrošak istih je planiran za tekuće održavanje putne mreže u MZ Mošćanica u iznosu od 35.000,00 KM i za izgradnju dječijeg igrališta u MZ Mošćanica u iznosu od 26.764,10 KM.

4. Udruženje Roma "Romane Asva" Zenica i Klub vijećnika SDP Zenica predlažu sredstva za subvenciju troškova grijanja za osobe koje su u stanju socijalne potrebe.

Stav predlagača

Stav predlagača i resorne Službe za socijalnu zaštitu, stambene poslove i društvene djelatnosti je da se navedeni prijedlog ne može prihvatiti. Subvencije za troškove grijanja za osobe koje su u stanju socijalne potrebe se mogu izdvajati tek nakon usvajanja odluka za subvencioniranje određene kategorije i u određenom iznosu. Za traženo još uvijek ne postoje odluke za prošireni krug prava iz socijalne zaštite, te tako niti analiza potreba za navedene subvencije.

5. Nezavisni vijećnik ispred nacionalnih manjina Almir Hrnjić i Udruženje Roma "Romane Asva" Zenica dostavili su prijedloge za planiranje dodatnih sredstava u Prijedlogu Budžeta Grada Zenica za 2025. godinu, i to:

- sredstva za dženaze/sahrane stanovnika u stanju socijalne potrebe, kao i za stanovnike slabijeg imovinskog stanja, beskućnike;
- sredstva za privremeno smještanje i zbrinjavanje osoba u stanju socijalne potrebe nakon deložacija i sličnih procesa;
- sredstva za adaptaciju i sanaciju dotrajalih objekata u kojima su smješteni građani u stanju socijalne potrebe;
- sredstva za finansijsku podršku Grada za obezbjeđenje kontinuiranog funkcionisanja Udruženja Roma.

Stav predlagača

Stav Službe za socijalnu zaštitu, stambene poslove i društvene djelatnosti, kao resorne službe, je da sredstva za dženaze/sahrane korisnika stalne socijalne pomoći već postoje u Budžetu Grada Zenica i kontinuirano se realizuju u skladu sa utvrđenim pravilima. Takođe, sredstva za jednokratne novčane pomoći socijalno ugroženim stanovnicima već godinama se planiraju u Budžetu Grada Zenica i izdvajaju se u skladu sa pojedinačnim zahtjevima i Pravilnikom, a kao prošireni krug prava iz socijalne zaštite. Resorna Služba se takođe izjašnjava da su i sredstva za održavanje stambenih jedinica iz programa socijalnog stanovanja planirana, kako u prethodnim godinama, tako i u Prijedlogu Budžeta Grada Zenica za 2025. godinu, ali da nažalost, zbog otežavajućih okolnosti provođenja postupka izbora izvođača radova i nezainteresiranosti privrednih subjekata iz navedene oblasti, iste nije bilo moguće realizovati.

Kada je u pitanju finansijska podrška Grada Zenica za obezbjeđenje kontinuiranog funkcionisanja Udruženja Roma, Služba za socijalnu zaštitu, stambene poslove i društvene djelatnosti, kao resorna služba, je stava da su sredstva za programe i projekte koja su planirana Prijedlogom Budžeta Grada Zenica za 2025. godinu dostupna svim udruženjima i fondacijama na jednakim osnovama.

6. Almir Hrnjić, nezavisni vijećnik ispred nacionalne manjine dostavio je sugestiju da se u Prijedlog Budžeta uvrste i sredstva za rješavanje putne i komunalne infrastrukture naselja Hamida, i to za MZ Novo Radakovo i MZ Staro Radakovo:

- iznalaženje načina i rješavanje problema odvodnje oborinskih voda na glavnoj ulici Marjanovića put u naselju Hamida;
- asfaltiranje i postavljanje rasvjete unutar krakova glavne ulice Marjanovića put u naselju Hamida, kao i sporednih ulica: ulica Margita, ulica Gradac, ulica 9. Maj, kao i ulica Josipovića put;
- rješavanje imovinsko-pravnih pitanja, završetak započetog asfaltiranja i postavljanje rasvjete u ulici 9. Maj;
- rješavanje problematike nedostatka pitke vode (druga faza) i rasvjete u ulici Josipovića put;
- sanacija kraka ulice Marjanovića put, od zgrade Jabuka do broja 10, kao i rekonstrukcija postojećeg stepeništa, dogradnja i spajanje istog sa ulicom Prve Zeničke brigade.

Stav predlagača

Služba za vodoprivredu, putnu infrastrukturu i mjesne zajednice, kao resorna Služba, kontinuirano predlaže Gradskom vijeću projekte na nivou Grada Zenica, te je u skladu sa tim, ulica Margita asfaltirana prošle godine, a asfaltiranje ulice Gradac je u završnoj fazi. Također, radi sa na rješavanju imovinsko-pravnih odnosa za sanaciju i asfaltiranje ulice 9. Maj. Služba za vodoprivredu, putnu infrastrukturu i mjesne zajednice će, nakon usvajanja Budžeta Grada Zenica za 2025. godinu, predložiti prioritetne projekte asfaltiranja i sanacije cesta, kao i projekte iz oblasti vodoprivrede, kako za MZ Staro Radakovo i MZ Novo Radakovo, tako i za ostale mjesne zajednice. Plan investicionih ulaganja u oblasti cestovne infrastrukture za 2025. godinu i Plan investicionih ulaganja u oblasti vodoprivrede za 2025. godinu razmatra i usvaja Gradsko vijeće Grada Zenica.

Sektor za ekologiju i komunalne poslove se izjašnjava da je MZ Novo Radakovo uvrštena u projekat "Modernizacija i proširenje javne rasvjete na području grada LED rasvjetom", a u sklopu kojeg je planirano proširenje sistema javne rasvjete u naseljima Hamida, Margita, 9. Maj, Gradac, ul. Josipovića put i Marjanovića put.

U skladu sa Ugovorom o izvođenju radova na proširenju i izgradnji javne rasvjete na području Grada Zenice, broj 02-11-1950-24/20 od 22.03.2022. godine, u ulici Marjanovića put realizovano je proširenje sistema javne rasvjete, koje je obuhvatilo i pokrilo trasu javnog puta. S obzirom da su radovi još uvijek u toku, preostala naselja u sklopu MZ Novo Radakovo izvodit će se u narednom periodu, a sve u skladu sa predmetnim Ugovorom.

7. Klubovi vijećnika SDP, BHI-KF, vijećnik Šemso Ormanović ispred stanke Pokret Zenica, te Sportski savez Grada Zenica predlažu povećanje budžetske pozicije "Transferi za sport". Vijećnik Šemso Ormanović i Sportski savez Grada Zenica predlažu povećanje za iznos od 500.000,00 KM,

klub vijećnika SDP Zenica za iznos od 150.000,00 KM, dok Klub vijećnika BHI-KF predlažu povećanje za iznos od 250.000,00 KM.

Stav predlagača

Predlagač je razmotrio upućene prijedloge, ali trenutno nije u mogućnosti prihvatiti iste. Napominjemo da su u Prijedlogu Budžeta Grada Zenica za 2025. godinu na ime sporta, planirana sredstva Grada Zenica u ukupnom iznosu od 14.552.000,00 KM, i to na sljedećim pozicijama:

- "Transferi za sport" u iznosu od 1.000.000,00 KM;
- "Izmirenje poreznog duga NK Čelik Zenica po zaključenom Sporazumu – reprogram" u iznosu od 337.000,00 KM;
- "Transferi za sport - besplatna škola plivanja i skijanja" u iznosu od 5.000,00 KM (a što je za 5.000,00 KM više u odnosu na Nacrt Budžeta);
- "Programi i projekti iz oblasti sporta" u iznosu od 30.000,00 KM;
- "Finansiranje rada JP za upravljanje i održavanje sportskih objekata d.o.o. Zenica" u iznosu od 400.000,00 KM;
- "Izgradnja i uređenje igrališta i sportskih terena" u iznosu od 500.000,00 KM (a što je za 100.000,00 KM više u odnosu na Nacrt Budžeta);
- "Transfer za popravku infrastrukture na Boračkom jezeru" u iznosu od 30.000,00 KM (a što je za 30.000,00 KM više u odnosu na Nacrt Budžeta);
- "Izgradnja zatvorenog olimpijskog bazena i aqua parka" u iznosu od 12.000.000,00 KM;
- sredstva u ukupnom iznosu od 250.000,00 KM na ime održavanja zelenih površina sportskih igrališta, održavanje dječijih i sportskih igrališta, te rekonstrukcija i investiciono održavanje dječijih igrališta.

8. JU Predškolski odgoj i obrazovanje Zenica i Naša Stranka Zenica podnijeli su prijedlog za uvećanjem sredstava za finansiranje rada JU Predškolski odgoj i obrazovanje Zenica, na način da se poveća iznos planiran na budžetskoj poziciji "Finansiranje rada JU Predškolski odgoj i obrazovanje Zenica", te da isti glasi 2.400.000,00 KM. Takođe, JU Predškolski odgoj i obrazovanje Zenica predlaže da se planiraju sredstva za investiciona ulaganja u iznosu od 1.450.000,00 KM, a koja bi bila namijenjena za tekuće održavanje i rekonstrukciju vrtića "Kanarinac" u Crkvicama, kupovinu auta i uređenje igrališta.

Stav predlagača

Stav Predlagača i resorne Službe za socijalnu zaštitu, stambene poslove i društvene djelatnosti je da se dostavljeni prijedlog trenutno ne može prihvatiti. U skladu sa dostavljenim budžetskim zahtjevom Ustanove, te uvidom u prethodno dostavljenu dokumentaciju i izvršenim detaljnim analizama, a cijeneći prihodovnu stranu i obaveze prema ostalim subjektima i obaveze koje Grad ima u okviru drugih budžetskih aktivnosti, ne može se prihvatiti uvećanje za navedeni iznos, jer je stavka već uvećana u odnosu na prethodnu budžetsku godinu. Naime, Prijedlogom Budžeta Grada Zenica za 2025. godinu planirani iznos na budžetskoj poziciji "Finansiranje rada JU Predškolski odgoj i obrazovanje Zenica" je 1.100.000,00 KM, a što je za 113.000,00 KM više u odnosu na Budžet 2024. godine.

Pored navedenog, Grad Zenica iz budžeta plaća i troškove grijanja ove Ustanove direktno JP-u "Grijanje Zenica" u godišnjem iznosu od cca 130.000,00 KM.

Izgradnja i rekonstrukcija objekata navedenih u zahtjevu nije u planu infrastrukturnih prioritetnih projekata za 2025. godinu.

9. Klub vijećnika SDA Zenica i klub vijećnika SDP Zenica predlažu povećanje budžetske pozicije "Transferi pojedincima - nagrade za nadarene učenike, studente, sportiste i dr."

Stav predlagača

Predlagač je prihvatio dostavljenu primjedbu, te u Prijedlogu Budžeta za 2025. godinu povećao sredstva na budžetskoj poziciji "Transferi pojedincima - nagrade za nadarene učenike, studente, sportiste i dr." na iznos od 40.000,00 KM, a što je za 20.000,00 KM više u odnosu na Nacrt Budžeta.

10. Dino Tihć predstavnik Naše stranke Zenica i Klub vijećnika SDP Zenica predlažu povećanje sredstava za energetska efikasnost – utopljavanje objekata koja se planiraju na budžetskoj poziciji "Izdaci za tekuće održavanje (energetska efikasnost i dr.)" i to za iznos od 350.000,00 KM.

Stav predlagača

Na organizacionom kodu Sektora za ekologiju i komunalne poslove, a u okviru sredstava Fonda za zaštitu okoliša FBiH planirana su i sredstva na budžetskoj poziciji "Izdaci za tekuće održavanje (energetska efikasnost i dr.)". Predlagač je u okviru trenutnih mogućnosti, u Prijedlogu Budžeta Grada Zenica za 2025. godinu, uvećao planirani iznos za ove namjene za 240.000,00 KM, tako da je sada ukupno planirani iznos na budžetskoj poziciji "Izdaci za tekuće održavanje (energetska efikasnost i dr.)" 890.000,00 KM. Napominjemo da prikupljena sredstva koja Fond za zaštitu okoliša FBiH raspoređuje kantonima, Vladi ZDK, prema Odluci o načinu raspodjele sredstava Fonda za zaštitu okoline ("Službene novine ZDK", broj: 18/12 i 1/15), raspoređuje na način da 70% uplaćenih sredstava sa područja lokalne samouprave, pripada tom općinskom/gradskom budžetu.

11. Klub vijećnika SDP-a Zenica predlažu povećanje sredstava planiranih na budžetskoj poziciji "Izgradnja i uređenje igrališta i sportskih terena" za iznos od 150.000,00 KM, te povećanje planiranih sredstava na budžetskoj poziciji "Transferi privatnim preduzećima i preduzetnicima (sufinansiranje projekata, finansiranje obrta i preduzetništva)" za iznos od 100.000,00 KM.

Stav predlagača

Predlagač je razmotrio upućene prijedloge, te djelimično prihvatio iste, tako što je u Prijedlogu Budžeta Grada Zenica za 2025. godinu na budžetskoj poziciji "Izgradnja i uređenje igrališta i sportskih terena" planirao sredstva u iznosu od 500.000,00 KM, a što je za 100.000,00 KM više u odnosu na Nacrt Budžeta.

12. Vijećnik Duvnjak Elmir - Snaga Naroda Zenica predložio je da se planiraju sredstva u iznosu od 50.000,00 KM na budžetskoj poziciji "Razvoj emisionog sistema JP RTV Zenica".

Stav predlagača

Predlagač je razmotrio dostavljenu primjedbu, te istu prihvatio i u Prijedlogu Budžeta Grada Zenica za 2025. godinu planirao sredstva na budžetskoj poziciji "Razvoj emisionog sistema JP RTV Zenica" u iznosu od 50.000,00 KM.

13. JU Dom-porodica Zenica i klub vijećnika BHI-KF Zenica predložili su povećanje sredstava na budžetskoj poziciji "Finansiranje rada JU Dom-porodica Zenica" za iznos od 300.000,00 KM, uz obrazloženje da iznos planiran Nacrtom Budžeta nije dovoljan da pokrije troškove plata radnika ove ustanove, a shodno Uredbi Vlade FBiH o utvrđivanju najniže plate u neto iznosu od 1.000,00 KM.

Stav predlagača

Predlagač je razmotrio dostavljenu primjedbu, te trenutno nije u mogućnosti da udovolji istoj, s obzirom da Vlada FBiH još nije u potpunosti definisala primjenu navedene Uredbe, odnosno da će provedba iste biti pojašnjena donošenjem pravnog akta kojim će se regulisati procedura povrata uplaćenih doprinosa, oslobađanje dijela doprinosa i sl.

14. Klub vijećnika BHI-KF Zenica sugerisali su da se sredstva planirana na poziciji za poljoprivrednu proizvodnju povećaju za iznos od 50.000,00 KM, kao i da se povećaju sredstva koja se planiraju na budžetskoj poziciji "Finansiranje rada JP za upravljanje i održavanje sportskih objekata d.o.o. Zenica".

Stav predlagača

Predlagač je djelimično prihvatio dostavljene primjedbe, te je u Prijedlogu Budžeta za 2025. godinu na budžetskoj poziciji "Podsticaj poljoprivrednoj proizvodnji" planirao sredstva u iznosu od 970.000,00 KM, a što je za 50.000,00 KM više u odnosu na Nacrt Budžeta.

15. Klub vijećnika BHI-KF Zenica i Erna Čizmić iz Zenice predložili su da se u Prijedlogu Budžeta za 2025. godinu planiraju sredstva na budžetskoj poziciji "Transfer za popravku infrastrukture na Boračkom jezeru" u iznosu od 70.000,00 KM.

Stav predlagača

Predlagač i resorna Služba za socijalnu zaštitu, stambene poslove i društvene djelatnosti, djelimično su prihvatili dostavljeni prijedlog za rekonstrukciju objekta kampa izviđača Zenica na Boračkom jezeru, te u Prijedlogu Budžeta za 2025. godinu uvrstavaju novu budžetsku poziciju "Transfer za popravku infrastrukture na Boračkom jezeru" u iznosu od 30.000,00 KM.

16. Gradski planinarski savez Zenica dostavio je primjedbu na Nacrt Budžeta Grada Zenica za 2025. godinu, a kojom predlažu da se budžetska pozicija "Finansiranje planinarskih i lovačkih udruženja" razdvoji na dvije pozicije, i to da se posebno planiraju sredstva za Gradski planinarski savez u iznosu od 40.000,00 KM.

Stav predlagača

Predlagač i Služba za socijalnu zaštitu, stambene poslove i društvene djelatnosti, kao resorna Služba, nisu u mogućnosti prihvatiti dostavljeni prijedlog. Navedeno finansiranje je predviđeno kao podrška programima i projektima svih planinarskih i lovačkih društava u skladu sa dostavljenim projektima i programima, i ista nije predviđena za finansiranje rada i funkcionisanja udruženja. Sve planinarske i lovačke organizacije na jednakim osnovama mogu prijaviti projekte i programe, koji će se analizirati i u skladu sa kvalitetom projektnog prijedloga ili programa podržati.

17. Neformalna grupa roditelja čija djeca pohađaju privatne vrtiće dostavila je molbu za subvencioniranje boravka djece u privatnim vrtićima. Navode da su nakon zadnjeg poskupljenja mnogi roditelji naišli na izazove u finansiranju boravka svoje djece u vrtićima, pogotovo ako se radi o dvoje ili više djece s obzirom da u tim slučajevima izdvajanja za troškove vrtića premašuju iznos minimalne plate u FBiH.

Stav predlagača

Predlagač i resorna Služba za socijalnu zaštitu, stambene poslove i društvene djelatnosti, nisu u mogućnosti prihvatiti dostavljenu primjedbu. Naime, Grad kao osnivač ima obavezu sufinansiranja u segmentu javne djelatnosti predškolskog odgoja i obrazovanja, te za istu izdvaja sredstva u iznosu od 1.100.000,00 KM. Imajući u vidu i zahtjeve drugih javnih ustanova i preduzeća, te planove infrastrukturnih ulaganja u tekućoj godini, nije moguće uvrstiti traženu subvenciju za sufinansiranje privatnih predškolskih ustanova.

18. Muslimansko dobrotvorno društvo "Merhamet" Zenica dostavilo je prijedlog da se u Budžet Grada Zenica uvrste sredstva za sufinansiranje rada i dijela režijskih troškova Regionalnog odbora "Merhamet" Zenica.

Stav predlagača

Predlagač je razmotrio dostavljenu molbu, te je stava da trenutno nije u mogućnosti obezbijediti sredstva za ovu namjenu u Prijedlogu Budžeta za 2025. godinu.

19. Zenička razvojna agencija "ZEDA" dostavila je primjedbu na planirana sredstva na poziciji "Transferi Agenciji ZEDA i REZ za podsticaj razvoja preduzetništva i obrta - finansiranje projekata", te predložila da se ista povećaju za 40.000,00 KM. Prijedlog izvora sredstava za navedeno povećanje nalaze u smanjenju budžetske pozicije "Transfer Agenciji ZEDA za podsticaj razvoja preduzetništva i obrta – projekat zapošljavanja pripravnika".

Stav predlagača

Predlagač je razmotrio dostavljeni prijedlog, te i pored stava da je neophodno kontinuirano pružati podršku razvoju preduzetništva, trenutno nije u mogućnosti uvećati sredstva za ovu namjenu u Prijedlogu Budžeta za 2025. godinu. Napominjemo da je u 2024. godini, Predlagač uvećao sredstva namijenjena za finansiranje djelatnosti Zeničke razvojne agencije "ZEDA" d.o.o. Zenica za iznos od 80.000,00 KM.

Što se tiče predloženog smanjenja planiranog iznosa na budžetskoj poziciji "Transfer Agenciji ZEDA za podsticaj razvoja preduzetništva i obrta - projekat zapošljavanja pripravnika", isto se ne može prihvatiti iz sljedećeg razloga: Agencija ZEDA je osnovana od strane Grada Zenica (Općine Zenica) 2004. godine sa ciljem implementacije projekata definisanih Strategijom razvoja Grada Zenica, odnosno s ciljem pružanja usluga od javnog interesa u svrhu lokalnog ekonomskog razvoja. Jedan od projekata je i projekat "Prvo radno iskustvo" koji se u kontinuitetu uspješno implementira već 15 godina, u saradnji sa Osnivačem, javnim preduzećima i javnim ustanovama na području Grada Zenica, kao i u saradnji sa Službom za zapošljavanje ZDK i Poreznom upravom.

20. JU Apoteke "Zdravlje" Zenica dostavila je primjedbu na planirana sredstva na budžetskoj poziciji "Transfer za zdravstvo - JU Apoteka Zdravlje Zenica", te predložila da se ista povećaju, jer sredstva predviđena Nacrtom Budžeta Grada Zenica za 2025. godinu nisu dostatna za potrebe odvijanja poslovnih aktivnosti JU.

Stav predlagača

Predlagač i Služba za socijalnu zaštitu, stambene poslove i društvene djelatnosti, kao resorna Služba, trenutno nisu u mogućnosti prihvatiti dostavljenu primjedbu, s obzirom da još uvijek nije usvojen potpuni model organizacije Ustanove od strane Gradskog vijeća, a koji bi riješio probleme sa kojima se suočava Ustanova.

21. Gradski hor "Kasiopeja" Zenica predložili su da se u Prijedlogu Budžeta Grada Zenica za 2025. godinu izdvoje sredstva u iznosu od 5.000,00 KM, te da ista budu namijenjena za finansiranje navedenog Udruženja.

Stav predlagača

Predlagač i Služba za socijalnu zaštitu, stambene poslove i društvene djelatnosti, kao resorna Služba, su razmotrili dostavljeni prijedlog, ali se isti ne može prihvatiti s obzirom da je navedeno finansiranje predviđeno kao podrška programima i projektima svih nevladinih organizacija i udruženja iz oblasti kulture, i isto nije predviđeno za finansiranje rada i funkcionisanja udruženja. Sva udruženja na jednakim osnovama mogu prijaviti projekte i programe, koji će se analizirati i u skladu sa kvalitetom projektnog prijedloga ili programa podržati.

22. Predstavnici šahovskog kluba "Čelik" Zenica predložili su povećanje iznosa koji se izdvaja iz Budžeta Grada Zenica, i to sa iznosa od 20.000,00 KM godišnje na iznos od 25.000,00 KM, a isti

je namijenjen za platu radnika, pripadajuće doprinose, održavanje prostora Šahovskog doma, grijanje, struju, vodu, odvoz smeća, kao i ostale režijske troškove Doma.

Stav predlagača

Predlagač i Služba za socijalnu zaštitu, stambene poslove i društvene djelatnosti, kao resorna Služba, razmotrili su dostavljeni prijedlog, ali trenutno nisu u mogućnosti udovoljiti istom.

23. Udruženje veterana BH rata i odbrane bosanske časti "Bosanska čast" predložilo je da se poveća planirani iznos sredstava na budžetskoj poziciji "Finansiranje organizovanja obilježavanja značajnih datuma, događaja i ličnosti Grada Zenica" za 20.000,00 KM, kao i da se poveća planirani iznos sredstava na budžetskoj poziciji "Transferi za finansiranje programa i projekata udruženja i organizacija boračke populacije" za 100.000,00 KM.

Stav predlagača

Predlagač je razmotrio prijedlog povećanja sredstava na budžetskoj poziciji "Finansiranje organizovanja obilježavanja značajnih datuma, događaja i ličnosti Grada Zenica", te isti nije prihvatio. Imajući u vidu činjenicu da je Budžetom Grada Zenica za 2024. godinu na navedenoj budžetskoj poziciji bio odobren iznos od 8.000,00 KM, koji u cijelosti nije potrošen, a Nacrtom Budžetom za 2025. godinu je predviđeno povećanje u odnosu na prethodnu godinu za 25%, odnosno planiran je ukupan iznos od 10.000,00 KM, predlagač je stava da su predložena sredstva u tekućoj godini dovoljna za realizaciju planiranih aktivnosti koja se finansiraju sa navedene budžetske pozicije.

Predlagač i resorna Služba za boračko-invalidsku zaštitu, nisu u mogućnosti prihvatiti primjebku koja se odnosi na uvećanje budžetske pozicije "Transferi za finansiranje programa i projekata udruženja i organizacija boračke populacije" za iznos od 100.000,00 KM. Naime, sredstva za navedenu svrhu u proteklom periodu bila su dostatna za provedbu programa i projekata sa kojima su udruženja i fondacije aplicirale na javni poziv.

24. Javno preduzeće "ZENICAGAS" d.o.o. Zenica predlaže planiranje sredstava za izgradnju primarnog gasovoda u ulici Željezarska, tj. Projekta pod nazivom "Primarna gasna mreže Poslovna zona Zenica 1 – GMRS Kanal", u iznosu od 650.000,00 KM.

Stav predlagača

Predlagač je razmotrio dostavljeni prijedlog, ali trenutno nije u mogućnosti planirati sredstva za ovaj projekat u Prijedlogu Budžeta za 2025. godinu, a sve zbog prioritarnog finansiranja kapitalnih projekata započetih u prethodnoj godini.

25. JU Centar za djecu i odrasle osobe s posebnim potrebama ZDK podnosi zahtjev da se u Prijedlogu Budžeta obezbijede sredstva na novoj budžetskoj poziciji "Transfer JU Centar za djecu i odrasle osobe s posebnim potrebama ZDK" u iznosu od 118.000,00 KM, a predlažu da se budžetska pozicija "Izgradnja, rekonstrukcija i održavanje poslovnih zona (Zenica 1 i Zenica jug)" umanji za isti iznos od 118.000,00 KM.

Stav predlagača

Služba za socijalnu zaštitu, stambene poslove i društvene djelatnosti, kao resorna Služba, je stava da se dostavljeni prijedlog djelimično prihvati, tako da je u Prijedlogu Budžeta za 2025. godinu uvrštena nova pozicija "Sufinansiranje rada JU Centar za djecu i odrasle osobe s posebnim potrebama ZDK", u iznosu od 50.000,00 KM, uz napomenu da Grad Zenica već obezbjeđuje besplatan prostor za djelovanje navedene ustanove.

26. Crveni križ Grada Zenica dostavio je prijedlog uvećanja sredstava za 35.000,00 KM, a na ime unapređenja postojećih aktivnosti, proširenja humanitarnih programa i osiguranja dodatne podrške najugroženijim kategorijama građana.

Stav predlagača

Predlagač je razmotrio dostavljeni prijedlog, te u skladu sa trenutnim mogućnostima, na budžetskoj poziciji "Učešće Grada u sufinansiranju Crvenog križa Grada Zenica i Centra za zdravo starenje u Zenici" planirao iznos od 20.000,00 KM.

27. Erna Čizmić iz Zenice, ul. Čurukovića put broj 25, predlaže planiranje sredstava za izradu projektne dokumentacije skijaške staze za djecu na Smetovima u iznosu od 50.000,00 KM. Takođe, predlaže da se u Prijedlog Budžeta uvrste sredstva kao transfer JU Predškolski odgoj i obrazovanje Zenica za izradu planske dokumentacije za rekonstrukciju vrtića "Kanarinac", kao i da se planiraju sredstva kao transfer za sport - besplatna škola skijanja i plivanja, sredstava za rekonstrukciju i sanaciju ulice Čurukovića put.

Stav predlagača

U vezi sa prijedlogom za planiranje sredstava za izradu projektne dokumentacije skijaške staze za djecu na Smetovima, ističemo da je projektna dokumentacija izrađena u decembru 2024. godine.

Stav Predlagača i resorne Službe za socijalnu zaštitu, stambene poslove i društvene djelatnosti, a koji se tiče izgradnje i rekonstrukcije objekta "Kanarinac", je taj da u 2025. godini, u planu infrastrukturnih ulaganja, nije izgradnja i rekonstrukcija objekta "Kanarinac", tako da taj prijedlog nije moguće prihvatiti.

Predlagač je prihvatio dostavljeni prijedlog da se budžetska pozicija za transfer za sport - besplatna škola skijanja i plivanja uvrsti u Prijedlog Budžeta za 2025. godinu, te je ista planirana u ukupnom iznosu 5.000,00 KM.

Stav Službe za vodoprivredu, putnu infrastrukturu i mjesne zajednice, kao resorne službe, po pitanju sanacije i rekonstrukcije ulice Čurukovića put, je da nije usvojen Regulacioni plan za to područje grada. Nakon usvajanja Regulacionog plana, Služba će poduzeti aktivnosti na izradi tehničke dokumentacije za rekonstrukciju predmetne ulice. U toku 2024. godine izvršeni su radovi na izgradnji prilaznog puta zgradi broj 22 u ulici Čurukovića put, obzirom da ta zgrada jedina nije imala prilazni put. Služba će, nakon usvajanja Budžeta Grada Zenica za 2025. godinu, predložiti prioritete projekte asfaltiranja i sanacije cesta grada Zenica. Napominjemo da Plan investicionih ulaganja u oblasti cestovne infrastrukture za 2025. godinu razmatra i usvaja Gradsko vijeće Grada Zenica.

Na kraju ističemo da je na Nacrt Budžeta Grada Zenica za 2025. godinu, kako se vidi iz ovog materijala, dostavljen veći broj primjedbi, prijedloga i sugestija od strane vijećnika, političkih stranaka, javnih ustanova, javnih preduzeća i udruženja, te mjesnih zajednica i gradskih službi, od kojih je predlagač, a u skladu sa mogućnostima, pojedine prihvatio i ugradio u Prijedlog Budžeta za 2025. godinu.

Na Nacrt Odluke o izvršavanju Budžeta za 2025. godinu nije dostavljen nijedan prijedlog, primjedba ili sugestija.

SLUŽBA ZA FINANSIJE